

**UKA2021/29: Meeqqat, inuusuttut inersimasullu akornanni naqinnernik ilisarinnissinnaanngitsut aamma atuarnermik allannermillu ajornartorsiuteqartut pillugit nuna tamakkerlugu iliuusissanik pilersaarusiornissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.**  
(Inatsisartunut ilaasortaq Sofia Geisler, Inuit Ataqatigiit)

**UKA2021/47: Naqinnernik ilisarsisinnaanngitsunut kalaallisut programimik ikiuutunik sanasoqarsinnaanissaa pillugu nalunaarusiamik Naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.**  
(Inatsisartunut ilaasortaq Aslak W. Jensen, Siumut)

**UKA/73: Inatsisartut isummerfigisassaattut siunnersuut Naalakkersuisut peqquneqassasut kalaallisuumik naqinnernik ilisarinnissinnaanngitsunut misissuummik ineriartortitsisoqarlunilu atuutilersitsisoqarnissaannik meeqqat atuarfianni ilinniartinnilu ingerlariaqqiffiusuni atorpeqartussatut.**  
(Inatsisartunut ilaasortaq Nivi Olsen, Demokraatit)

### **Akissuteqaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

### **Siullermeerneqarnera**

Naalakkersuisut Inatsisartunut ilaasortat Sofia Geisler (Inuit Ataqatigiit), Aslak W. Jensen (Siumut) aamma Nivi Olsen (Demokraatit) aalajangiiffigisassatut siunnersuutaannut qujaffigaat.

Oqaluserisassani immikkoortut 29, 47 aamma 73, atuarnermik allannermillu ajornartorsiuteqarnermut aamma naqinnernik ilisarsisinnaannginnermut tunngasut ataatsimoortillugit oqallisigineqassapput. Immikkoortut imminnut attuumassuteqarmata ataatsikkoortillugit akissuteqaasiorneqarput.

Meeqqat, inuusuttut inersimasullu akornanni naqinnernik ilisarinnissinnaanngitsut aamma atuarnermik allannermillu ajornartorsiuteqartut ikiorserniarlugit iliuusissanik pilersaarusiornissamut suliaqarnissaq UKA 2011-mi akuersissutigineqarpoq (imm. 131), kisiannili 2014-imi qinersisoqarneranut atatillugu unitsinneqarluni.

Naak nuna tamakkerlugu iliuusissanik pilersaarusiornissamut suliaq 2014-imi unikkaluortoq, periusissiamit suliaqarnermut suliniutit ingerlateqqinneqarput. Meeqqanut, inuusuttunut inersimasunullu atuarnermik allannermillu ajornartorsiutilinnut aamma naqinnernik ilisarsisinnaanngitsunut suliniuteqartoqarnikuvoq. Suliniutit meeqqat atuarfiannut, Majoriamut, GUX-S-imut allanullu saaffiginnipput. Ilaatigut Ilinniartitaanermut Aqutsisoqarfiup 1.-3. klassini atuartunut misiliutit inerisarpai. Tamatumani siunertaavoq atuartut naqinnernik ilisarsisinnaannginnissamut ernumanaateqartut paasinissaat, atuarnermik ilinniartitsinikkut suliniutit atuartunut ataasiakkaanut naleqqussarsinnaajumallugit.

Immikkoortumi pingaaruteqartumi tamatumani suliniutinik aallarnisaasoqarsimanera pitsaasuvoq. Tamatuma uppersarpaa, ilinniartitaanermik aqqissuussinerup iluani ingerlatsiviit susassaqtullu assigiinngitsut, atuarnermik allannermillu ajornartorsiutit aamma naqinnernik ilisarsisinnaannginnerup isiginiarneqarnissaasa pingaaruteqartuunerat annertuumik eqeersimaarfigaat.

Pineqartumut tunngatillugu iliuusissanik pilersaarut oqaluuserisassani imm. 29-mi siunnersuutigineqartoq, meeqqat, inuusuttut inersimasullu atuarnermik allannermillu ajornartorsiuteqartut aamma naqinnernik ilisarsisinnaanngitsut ilinniarnermi eqqortumik ikiorserneqarnissaannut iluaqutaassaaq, ilinniakkaminnillu naammassisinnaanngortillugit.

Imm. 47-mi siunnersuutigineqartumut tassalu, kalaallisut programminik atortussanillu ikiuutinik inerisaanissamut periarfissat pillugit nalunaarusiamut tunngatillugu, meeqqat, inuusuttut inersimasullu akornanni atuarnermik allannermillu ajornartorsiuteqartarnek aamma naqinnernik ilisarsisinnaannginneq pillugit nuna tamakkerlugu iliuusissanik pilersaarusiut pissusissamisuginnartumik ilaassasoq Naalakkersuisut nalilerpaat.

Ilinniartitaanermut Aqutsisoqarfiup, Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfiup ataaniittup, nalilerpaa, oqaluuserisassami imm. 73-imi siunnersuutigineqartut naqinnernik ilisarsisinnaanngitsunut misiliummik kalaallisuumik inerisaanissamut atatillugu unamminartut arlaqartut. Tamanna § 37 tunngavigalugu apeqquteqaammut 2021/40-mut akissuteqaammi ersippoq, tassani ilaatigut ersippoq kalaallit oqaasiisa ilusaat oqaatsinut allanut naleqqiullugu malunnaatilimmik allaanerussuteqartut. Taamaammat misiliummik pilersitsissagaanni kalaallit oqaasii aamma naqinnernik ilisarsisinnaannginneq pillugit immikkut ilisimasaqarnissaq pisariaqarpoq. Ullumikkut kalaallinik naqinnernik ilisarsisinnaannginnermik ilisimatusartoqanngilaq, atuartullu atuariaasii pillugit paasissutissanik peqartoqarani.

Taamaammat naqinnernik ilisarsisnaannginnermut misiliummik kalaallisuumik inerisaasoqassapat siullermik pisariaqarpoq, pineqartup iluani suliaqartussanik piginnaasalinnik sulisussarsioqqaarnissaq ilinniartitseqqaarnissarlu, kalaallisut misiliutaasinnaasumik inerisaasoqannginnerani.

Nangillugu naqinnernik ilisarsisnaannginnermut misiliummik inerisaassagaanni pisariaqarpoq, paaseqqissaassallugu misiliut taamaattoq sumut atorneqassanersoq, aamma meeqqanut, inuusuttunut inersimasunullu ataasiakkaanut tunngatillugu paasisaasut sumut atorneqarniarnersut.

Pissutsit tamakku tunngavigalugit, Naalakkersuisut nalilerpaat, naqinnernik ilisarsisnaannginnermut misiliummik kalaallisuumik inerisaanissamut periarfissanik qulaajaaneq, naqinnernik ilisarsisnaannginneq aamma atuarnermik allannermillu ajornartorsiuteqarnek ikiorsiiviginiarlugit nuna tamakkerlugu iliuusissanik pilersaarusiortuni suliaqarnermut ilaasariaqartoq.

Taamaammat Naalakkersuisut inassutigaat, atuarnermik allannermillu ajornartorsiutit kiisalu naqinnernik ilisarsisnaannginnermik suliat nuna tamakkerlugu iliuusissanik

pilersaarusiamut – pineqartup iluani suliat ataatsimik sammivissinnissaannut peqataasussamut - katersorneqassasut.

Tamanna tunuliaqutaralugu Naalackersuisut inassutigaat, imm. 29, naqinnernik ilisarinnissinnaanngitsut aamma atuarnermik allannermillu ajornartorsiuteqartut pillugit nuna tamakkerlugu iliuusissanik pilersaarusiornissamut siunnersuut, akuersissutigineqassasoq, aamma imm. 47-mi 73-imilu siunnersuutaasut iliuusissanik pilersaarusiamut ilaatinneqassasut. Taamaalilluni atuarnermik allannermillu ajornartorsiuteqarnermut aamma naqinnernik ilisarsisinnaannginnermut tunngatillugit suliat iliuusissanik pilersaarummi ataatsimi katersorneqassapput.

Taamaammat imm. 47-mut allannguutissatut siunnersuut una saqqummiunneqarpoq: ”Naqinnernik ilisarsisinnaanngineq aamma atuarnermik allannermillu ajornartorsiuteqarneq ikiorsiiviginiarlugit nuna tamakkerlugu iliuusissanik pilersaarummik suliaqarnermut ilaasussamik, kalaallisut programimik ikiuutunik sanasoqarsinnaanissaa pillugu nalunaarusiamik Naalackersuisut suliaqaqqullugit peqquneqarnissaannik Inatsisartut aalajangiinissaannik siunnersuut.”

Kiisalu imm. 73-imut allannguutissatut siunnersuut: ”Naqinnernik ilisarinnissinnaannginnermut misiliummik kalaallisuumik nuna tamakkerlugu atuuttussamik ineriartortitsinissamut periarfissanik qulaajaaqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Tamanna naqinnernik ilisarsisinnaanngineq aamma atuarnermik allannermillu ajornartorsiuteqarneq ikiorsiiviginiarlugit nuna tamakkerlugu iliuusissanik pilersaarummik suliaqarnermut ilaasaaq.”